

四庫全書

集部

欽定四庫全書

集部

清江三孔集卷二十八

九

詳校官中書_臣張經田

助教_臣常循覆勘

總校官知縣_臣楊懋珩

校對官助教_臣蔡鎮

謄錄監生_臣何貽隣

欽定四庫全書

清江三孔集卷二十八

宋 孔平仲 撰

詩戲

芸叟寄新詞作八陣圖一首

功業不復議蓋載無所容三湘逶迤水分與清河公國
士大手筆名聲蔚摩空成材兼衆製八面任見攻陣馬
勢道勇圖繪出纖穠江神敷妙詞流入韶濩中石心鐵

為腸不意於此工轉調協擊拊遺音扣玲瓏恨我狂既
和失之太忽忽吞咀知雋永吳越安可同

二十八宿寄芸叟

張公角立孰敢先亢宗自許英妙年捕逐氐羌先著鞭
文房餘思如涌泉題詩寫心蟠遠煙黑蛟矯尾明秋淵
南箕吐舌風墮煙弱羽斗落柳江邊蝸牛客舍吊影眠
寒女晚嫁私自憐誰知虛實久粲然安危之理如循環
歸來藏室閱青編東壁步武追神仙綉衣白簡猶奎躔

體健不復婁金丸腸胃充實頰骨堅昂宿老人飛上天
志願未畢西魄邊野鶴礪背不啄羶曾參殺人知謬傳
賞花墜井皆忘言載鬼一車疑已捐人欲折柳送公船
去同衆星環紫垣張公張公人最賢丹鳳奮翼蔚高騫
更調玉軫續薰絃

卦名寄芸叟

小豐猶可喜況此大有年流庸已歸妹獄訟久蕭然明
聖臨六合吁俞萃羣賢乾坤協氣滿井邑歡聲連張公

性謙靜玉節鎮湘壩舍富暇豫鈴齋恒晝眠萬家人
喜悅鄰壤蒙安全譬如泰山雲益此涸轍泉我鄙無所
解昔隨公得仙超升已連帥羈旅今華顛屬郡損末理
郵筒責新篇坎坎我鼓腹咸韶媿朱絃睽乖每自念始
遇兩何緣野色小過雨秋聲漸號蟬園林淒剥落樓觀
蔚騰騫曳履煙景外支頤嵐翠前嘗聞東晉士多聞遠
師禪盛世非否塞微生自屯適廬岳決遯去老夫无妄
言迹同人間世心鍊鼎中鉛流俗若飛蠱困途多墮鳶

相需巖嶺上一比洪崖肩

本是一首寄芸叟

本是同根生
相煎何太急

本末已倒置是非當告誰同為天涯客根冷聊相依
生平尚氣節相約老不衰煎烹雖炎炎何損百鍊姿
太過空自反急鞭尤恐遲

相看一首寄芸叟

相看過半百
不寄一行書

相與同少壯看看俱老人過日如脫兔半生若浮雲
百事多齟齬不如收此身寄心青霞杪一笑輕千鈞
行行

秋鴈去書此贈情親

朋友一首寄芸叟

朋友數
斯疏矣

面朋隨俯仰心友存終始頻數寄詩書因斯作瘡痂此
疏彼何密已矣難湔洗

題織錦璇璣圖迴文

紅牕小泣低聲怨永夕春寒斗帳空
中酒落花飛絮亂
曉鶯啼破夢忽忽

啼草露如郎行薄亂花風似客情
多歸鴻見處彈珠淚

語燕聞如飲翠蛾

同誰更倚閒牕繡落日紅扉小院深東復西流分水嶺
恨無愁續斷絃琴

腸斷寫愁縈字字錦紋傳意寄君看牀空照月殘燈冷
黃葉霜前秋信寒

前堂畫燭殘凝淚半夜清香舊惹衾煙鎖竹枝寒宿鳥
水沉天色霽橫參

星名詩呈提刑曾朝散

華胄參元後高門輔弼臣
莊池初奮翼舜旦早逢辰
雲木千尋秀鑪金百煉純
日邊虛位著楚尾望車塵
尚德真膚使存心信吉人
包含譽尤美平格澤惟均
短髮連衰老黃金媿拊循
禮容長不責恩義極相親
最要箕張口深憐井有人
孤危荷全度謀報畢餘身

和徐道腴波字

虔州作人名

人橫玉管寧無意風入春江總是波
把袂相牽招飲去
岳陽城外酒徒多

席上口授杜仲觀

虔州作人名

暮雨蕭蕭何不止東風弄白起江波綠楊綰作同心結
杜子春來狂興多

累約慎思親事今已入境盤桓不進欲以十四日交
承又云六甲窮日戲作藏頭一首

工巧新詩寄遞筒同聲稍稍變他宮口傳知受諸君指
日好何論六甲窮躬自省愆方久仄人多助虐更磨礱
石渠舊友年家契大笑今朝已落空

慎思移日至月望交割口占奉呈

藏頭體

日日高樓倚望君口吟心想跂清塵土膏著雨蒼葭出
山色凝雲翠黛顰卑冗一官誰羽翼異同千狀極艱辛
十分明月迎新守寸步江村老盡春

建茶一首

建除滿平定執
破危成收開閉

建茶一杯午睡起除渴蠲煩無此比滿庭葉暗啼野鶯
平地兩足生春水定心寧息守丹竈執固養和歸赤子
破須速補勉旃修危可求安灼然理成事何論軒冕貴

收身早占雲泉美開門納盜誤人多閉關掃軌從今始

周亨叔推官見示詩軸

黃絹幼婦
外孫齏臼

黃金鍊語玉琢詞絹素中度無輕紕幼時文采已奇絕
婦老兒長今可知外窺驕虜亦有作孫吳暗合和兵畧
齏鹽氣味異膏粱白中丹砂非俗藥

集文選句贈別

離別在須臾

李少卿

置酒宴所歡

陸士衡

借問此何時

張景陽

萋萋春草繁

謝靈運

江蘼生幽渚

陸士衡

山櫻發欲然

沈休文

游絲映空轉

沈休文

紅藥當階翻

謝玄暉

飛鳥繞樹翔

曹子建

哀猿響南巖

謝靈運

相與數子游

劉越石

行邁越長川

陸士龍

相去日已遠

枚乘

光景不可攀

曹子建

舉目增永慕

盧子諒

叙

意於濡翰

劉公幹

文選集句寄慎思交代學士慎思遊岳老夫守舍

叙述遊舊慎問交承與夫舍舟登陸之策俱在

此矣

鄧生何感激志尚好詩書清機發妙理言論準宣尼翰

墨時間作文雅縱橫飛彌年缺相從夢想見容輝自昔
同寮寀恩愛兩不疑潔身躋秘閣攜手游郊畿一麾乃
出守桑梓有餘輝濡迹涉江湘將就衡陽棲渺渺孤舟
游洲渚既淹時鳳凰集南嶽平生遂幽期岩峭嶺稠疊
高高入雲霓企石挹飛泉陵岡掇丹萸卽事既多美游
子澹忘歸春仲尚未發悠悠隔山陂今我惟困蒙處身
孤且危顧影悽自憐悄悄令人悲一心抱區區知音世
所希塊然守空堂高牕時動扉仰視浮雲翔密雨如散

絲中夜撫枕歎軒車來何遲
傾想遲嘉音會合何時諧
借問下車日臨路猶遲迴
春江壯風濤漁潭霧未開
肅此塵外軫以副飢渴懷

一勝篇

我與承君碁結局贏一路
太多亦何用停則無勝負
天清與地寧妙絕占此數
正如賈堅射不中乃奇處

再勝篇

再勝路幾許非一亦非三
小雅連大雅周南兼召南
舜

目處其半臨文與之參在我猶不足自笑無乃貪

嘲承君

已填實局餘五黑、天數相符豈人力、雖於洪範少四疇、
若比武成多二策、我詩雜組今幾首、鼯鼠技窮那復有、
泰山風拔大夫松、彭澤霜隕先生柳、

承君棊輸包子詩以促之

君看射夫指柔軟、作皮室君看艷婦手縫帛、恐不密、草
木漸叢生、正渴袖與橘、亟遣中丞來、莫令章句出

承君非老荒意似羞棊敗未應倒干戈當且解粉黛如
何畫虎手乃作死麕態貢茅緩不誅含覆吾已大

承君輸十三篇

欲知輸籌數計月乃閏年秦箏有幾絃汴上樓幾間寶
從真如獻人遜耿恭還老氏死之徒孫子著書篇

走筆呈承君

承君侍人蕭氏

圍棊屢北當復戰乘興能來不待邀杜牧詩如道今日
最宜簷雨竹蕭蕭

風人一絕

承君恭
愉冷淘

須煩玉手自操刀
便起槐芽作冷淘
刺潑葱油抹羊肉
不嫌瀟灑愛蕭騷

戲承君

一自棊輸日望之
至今蕭蕭草生時
知君苦愛刀筆吏
使我長吟風雨詩
已共苞糧泉浸濕
更聽甫草馬鳴悲
子雲寂寞方無賴
想見聲香雜祭脂

越上荒闕浪得名
如何開邑在彭城
飄蕭雲意迷秋日

索寞人心戀玉京花倚宮牆無限好泉流古寺有餘清

盡焚野艾栽修竹更聽虞絃奏九成

蘇子美詩秋日清
淡雲飄蕭

至忠至朴少人知思話胸中聽者誰長史移家真暫住
相君為闕定他時道齋不廢持三寶資斧何須措一辭
更有閒堂奉清宴客來簷雨看圍碁

次君門戶想風標千載齊梁已寂寥隋后如何依異域
秋晨定不怨涼飈半揎紅袖能調瑟滿把真珠看缺條
它日蘭陵若歸去臨江灘上畧相邀

承君輸棊八路

君希元凱才我異厨顧黨誅蠻幾首級十指屈其兩疾
風摧桂林異夢吞卦象疲極曳杖歸顰眉有餘快

蕭器之小飲誦王舒公藥名詩因效其體

蕭郎嘉客近遠志把酒勸賓郎半醉自然同類易相投
官守從容况無事清晨麴蘖寒有力倒洒金鍾乳花滴
十分蘸甲香且醉不覺昏黃連夜色雀噪烏栖奈晚何
忽忽白日若飛梭青青百草霜已歇牆陰淺白微輕雪

庭梅香膩粉苞解歲律將旋復花發銅壺泣水銀箭短
漏聲斷續隨風遠起視天南星斗稀蟾蜍已黑牽牛低
知子多情惜分散山公酩酊自當歸

再作藥名詩一呈器之

肥羊作臙香出厨膏梁姜闕品味俱夙開東閣戒諸客千
金騰踊沽酒壺飛觥倒杓約不退一卷百盞皆無餘不
須呼盧會六博笙簧琴筑非真樂蕭郎獨以酒娛賓憐
子心勤憎子虐眼前覆花不容起面赤復令須滿酌更

深閃閃燈焰消照天燭黃蠟洒膏欲逃人覺安敢去飲
水只欲吞波濤青烟鬱鬱金鴨細花上紅酥合香蒂四
垂銀箔不知寒却勸金罍子同醉久不見子眼空青見
子宛然猶舊情敗舡如篴寄江水天陰夜半防風起告
歸急走城西角如粉霜花衣上落屢蒙大幅掃長篇才
薄何由繼高作

與董承君棊輒勝四籌作藥名五言詩奉戲

董子獷且狂孔公孽更毒文楸石棊子白及黑對局預

知子輕敵銳膽坐看覆一時羅列徧先與推大腹欬如
飛廉驅窘若防風戮餘兵尚百合續斷聊忽忽猛虎伏
爪牙中塗佯躑躅嗟嗟草草甚驅猪令追逐直前無夷險
感撥下子速而我頗從容莽草草先設伏常山肆縱橫大
戟挾長轂威靈先震盪巨勝倂破竹蕭蕭馬鳴退戰血
餘川谷百步笑奔崩獨活嗟窮蹙萎蕤不復騁銷蝕神
采縮作詩誚伊基我壯知子曲

宣父寄示與譙冲元唱和藥名詩因作一篇奉寄

天南星斗垂晶熒，麻姑山色排空青。人中白眉誰第一，
周郎獨以文章名。少年折桂心已壯，大學弱冠衆所驚。
嚴徐長卿詞格老，合上雲臺預讎討。赤車素者已為淹，
復令倖郡淮南道。蘄春何幸人熙熙，有賢使君子副之。
鈴閣深沉香一炷，綵牋舒卷百篇詩。藏鱗伏翼聊展轉，
有才無患子不顯。楚澤蘭芳莫謾悲，秦烏頭白終當返。
我栖江上松蘿深，自甘草莽長陸沉。忽忽光景又半夏，
書房風月澄人心。昏黃禽噪悄不樂，架木通渠清河濯。

雨餘涼風襲衣襟
半天河漢垂簷角
惟恨與子未從容
紫芝眉宇何時逢
頻以青琅玕寄我
不須怕悵白頭翁
再作藥名詩一首
寄亶父並用本字
更不假借此

諸名布在本草中
雖或隱晦然以為
不當但取世俗之
所知而遺其所不
知亦君子之用心
也至於搜索牽合
亦可以發人意思
而消磨光景請亶
父同作

憶昔見子龍沙邊
冰臺玉壺氣凜然
才薄人微辱取友

青蒿媿倚崑崙顛詩鋒利如立刀劍談經辨博森戈鋌
賢愚校我幾百倍預知子必轉青天別來喧卑共誰語
神遊閬苑長思仙京師再見空草草瑣細辛勤官事牽
如今相去水南北一別羈旅還隔年每思益友在咫尺
九江地與蘄黃連作詩寄我解離恨紫貝珊瑚堆目前
靈蛇含珠久不吐駿馬銜脫誰能先彌天雄句駭俗耳
入木香煤濡綵牋嗟余鄙訥會強敵蜀雞格鬪非所便
未甘遂服強一戰光焰消縮何由然我居此土頗大適

門對廬山飛玉泉火雲燒赤赫日熾委蛇退食甘晝眠
環池老木自却暑清波白石明相鮮木香漠漠初過雨
水英燦燦新開蓮區區余心最念子空對黃昏江月圓
重樓遠望君不見淮南細草迷蒼煙

亶甫寄示廬山高藥名詩亦作一首奉酬不犯唱
首無用本字更不假借

噫戲廬山乎高哉山連大江勢橫絕虎卷龍拏起霜雪
五湖七澤瀉波來百穿千孔吞吐成雲雷其上自有飛

瀑水白如一足練半天河漢傾崔嵬蒼蒼石壁挿空翠
漠漠雲華自開閉水甘松香澗谷深黃精枸杞生成林
地無虎狼毒草木但聞仙童玉女語笑之清音君不見
當時匡續斷世故結廬菴草無尋處又不見淵明無心
五斗米石床醉卧呼不起真君種杏人獲生遠公白蓮
開玉英松肪柏實皆可飽何必皓露棲金莖我欲攀崖
採紫芝道中逢仙一問之接余之手生虹蜺崑崙大室
相追隨玄臺絳闕恣遠遊旁通三島逮十洲柯消石爛

未肯休千秋萬歲一瞑目下視塵世如蝸牛

八音詩

六首

金風盪炎暑六合氣已清石崇南山高晨起見崢嶸絲
垂虫就蠶彼各有所營竹實不足飽鳳凰尚飢鳴匏瓜
固賤草引蔓上高城土地之所宜結子如餅罌華帶守
空文歲月逝可驚木落行且秀欣欣候春榮

金杯十分酒酌子消百憂石可補青天棄與瓦礫侔絲
可弦南風織成絹素柔竹帛未書功光景忽以邁匏繫

久不食栖栖江上洲
土鼓與蕢桴為用先
鳴球革帶人所賤
猶列下邳侯
木有棟梁材終當回萬牛

金谷草離離
綠珠魂已蟄
石崇雖富貴一散不可集
綠亦不須悲
岐亦不須泣
竹林諸逸士以醉名
自立匏絃且為樂
惜此光景急
土人勸我勤
朱紫當早拾
革性以從容
矯揉未易入木
散姑自全寧
求斧斤及

金色晦塵垢
人疑以為鍮
石有潔白姿
昧者比琳瑯
絲綵不盡緒
誰與結綢繆
竹可栽笙竽
奈何困薪樵
匏黃

已落蒂歲序颯驚秋土壤厭卑濕山川嗟阻修革車召
武士折敵當與謀木鐸一奮劔為君斬倡優

金絃調陰陽諸公盡梁棟石室校圖書英才皆屈宋絲
侵鬢邊髮瀕老知無用竹徑理舊居蔬畦閱新種匏剗
以酌酒自唱出歌送土燥葉可收水清魚益衆革屨隨
藜杖徜徉步方縱木末見栖鴟瞑歸街鼓動

金烏卷海水東欲上扶桑石性本沉滯不能隨波揚絲
縈自作蠶漸老甘退藏竹會有青色牽人幽興長匏羹

若可飽何必羨牛羊土室若可安不須高棟梁革以脂
自柔鐵遇火則洋木可揉而直惟士心有常

又謝諸君酌和

金蘭諸益友一一皆詩家石音盡清越使我慙淫哇絲
勢強抽緒語句多疵瑕竹牋屢塗竄誰謂點不加匏實
雖百枚不如一甘瓜土朱重千鈞不如一丹砂革去齊
梁體羨君吐天葩木強未肯休餘辭綴車斜

又奉項元帥

金剛有遺偈難以聲音求石擊乃有光是名為火不絲
從何處來認著從蠟抽竹本由根生根外又何由匏開
即為勺針屈即為鉤土地水火風合為一浮漚革易固
不常為山水牯牛木性無榮謝古今春復秋

又奉朱明叟

金榜閱名姓於今二十秋石隕鷁退飛才命不相謀絲
繩可比直應笑曲如鉤竹未遇蔡邕有聲誰見求匏瓜
豈無蔓奈何枝不膠土俗相慢侮有如東家丘革囊貯

珠玉至寶勿暗投木若假先容為君効綢繆

又奉周文之

金臺招俊乂之子值明時石蘊荆山璞當為璧與珪絲
隨物所染在涅要不淄竹箭中有筠歲寒尚猗猗匏葉
異甘苦采掇須自知土性殊美惡栽培擇所宜革急而
土緩古人貴調肺木老雁被烹吾師乃支離

郡集虎渡亭賓主十人

五首

築館當陽月驅車及上旬盈分勸美酒排旨聚佳賓闕

里推高第姬朝倚亂臣全豎參老手駕駕望清塵佛地
前緣闕堯曦普照均瀛洲何足羨天日坐中人

欲結朱輪日相期已及旬木圖橫畫棟玉德集談賓濟
濟多周伯詵詵倍舜臣身調宰夫膳目視屬車塵聞一
才將埒能千智亦均可知前世陋作者欠三人

璜臺成百日斗酒宴茲旬文雅昇平客風流結綺賓橈
椎皆敏手諫俎必名臣御史歸清望黃門掃俗塵專門
知業廣就傳亦年均忠信推吾邑疇非善行人

盛比芳林會歡非洛汭旬國城推帥長龜數集朋賓益
一參卿列增三補諫臣天泉開象緯日輝散光塵束帛
蒙恩厚茲弓校力均論言雖幼學柳惲實兼人

長亭接雙堠良月屆初旬修義推賢守同心會衆賓公
卿正當位與隸迭相臣庇蔭樓層勢追隨驥步塵束新
恩不薄鼓玉價仍均共取封侯貴持旌將萬人

一字至七字送夢錫夢錫託疾引歸

行行宿駕宵征秋漸老雨初晴黃葉歸思青山去程身

隨一鴈遠眼入故鄉明流水光陰可惜浮雲軒冕自輕
把酒日飛鸚鵡盞尋花更到鳳凰城

七字至一字

仕宦千憂出海濤功名一笑付秋毫榮望棄如脫屣歸
心斷若操刀東堂展圖畫北牖綴風騷晴煎越茗寒汎
宮醪超世網釋天姦就逸辭勞高高

十一月十二日會集賓主共八人

自笑開陽畔輝光接斗魁名希周士貴德慕舜元才共

享珍羞美同騎駿馬回它時立天柱曾作飲仙來

清江三孔集二十八

欽定四庫全書

清江三孔集卷二十九

宋 孔平仲 撰

表

賀坤成節表

伏以里社之鳴恊詩人之七月華封之祝詠君子之萬
年翕然歡聲出於誠意謝中臣聞安則蘄久樂則重生此
雖人之常情亦繫上之所養當夫海內無事年穀屢豐

里閭之間民不識於兵革州縣之內吏或長於子孫相慶之年皆謂太平之難得歸美之意惟欲聖壽之無疆恭惟太皇太后陛下寬靜以服人心公平以當天意近無馬鄧遠過姜任歷觀載籍之所傳莫如今日之為盛適屬誕彌之慶益輸難老之忠鑒於太清順金行之初肅受茲介福扶寶祚於不騫臣祇服官常阻趨朝闕瞻天望聖激切屏營之至

賀坤成節表

伏以坤元之施實佑斯民沙麓之祥正當此日神祇協

贊夷夏驩呼

謝中

臣聞得人心者莫如惠和鎮天下者無

如安靜我有三寶是為聖德之符胡不萬年茲見詩人
之意恭惟陛下聰明恭儉寬厚謹嚴八年之間四海無
事適邁誕彌之旦咸輸難老之忠臣廁跡書林脩員使
斧稱觴上壽阻陪北闕之班決獄求生仰助南山之筭

江淮提點謝到任表

奉饒二年訖無善狀督鑄諸道即拜命書已及官期祇

承局事

謝中

伏念臣奮身卑薄涉世曲糴無有尺寸之長

可應朝廷之用矧屬擇人之際尤當出使之行此蓋伏遇

皇帝陛下盛德溥臨至仁兼覆不遺管蒯之賤雜用薪

爇之材如臣之愚猶在所取臣敢不効勤奔走悉意經

營謹課入于銅山視工程于金冶庶收微効仰報大恩

衡州謝到任表

淮右按刑訖無善狀湘東出守仰荷寬恩已見吏民奉

宣詔令

謝中

臣稟生愚陋涉世曲糴逢熙運之有開與羣

材而並進四塵使節兩玷曹郎老境驅馳筋骸已瘁小
邦撫字才術何堪此蓋伏遇皇帝陛下明極照臨德參
覆幬方獨觀於萬化不求備於一夫遂致孤貧亦叨任
使臣敢不悉心職事圖報國家庶集涓埃上裨海嶽

饒州居住謝表

幾死得生自南徂北蒙還舊秩獲處善邦銜恩涕零省
咎心悸謝中臣學問蹇淺智識鈍昏妄陳答詔之言自擬
投荒之辱瘴癘侵薄骨肉分離安知此身復見今日此

蓋伏遇皇帝陛下離明燭遠渙澤蘇枯盡返得罪放逐
之人大開自新湔洗之路而仰食者衆須舟以行風波
多虞疾病間作所恃朝廷之寬大不誅道路之濡留驚
魂初招餘孽未追更當刻厲少答存全

叙復朝奉大夫謝表

荒山相囚貧室如磬稍遷內地盡復故官此恩若何隕
涕無已中謝伏念臣仕官積久咎惡滋多始罷皇華之行
再鐫東觀之職又陳伏罪遂斥遐陬泣血追愆豈由上

疏觀過於黨或可知仁果丁昭曠之辰均被湔洗之澤
此蓋伏遇皇帝陛下一新庶政獨斷萬機照臣下之忠
邪訂朝廷之枉直故茲廢放亦預甄收脫迹瘴鄉猶記
海鷺之墮經塗故里忽聞塞馬之歸更誓捐糜少期報
塞

謝崇寧歷日表

刑獄之官兼領勸農之職郡縣所隸均被頒朔之恩况
更新元尤寵上賜謝伏以定四時而成歲唐堯致於變

之隆審七政以當天虞舜底極治之盛竊原陰陽之理
實與政事相通苟裁成輔相之得宜則寒暑雨暘之咸
若恭惟皇帝陛下道參覆載明合照臨先而弗違固已
謹言動之表順以求合又將擇疏密之中乃飭疇人使
齋大紀氣從緒正四時有玉燭之和歲且順成萬物極
崇立之大臣謹當上宣聖澤下布人時庶集微勞仰裨
鴻化

永興提刑謝表

呂刑三千人命所繫秦關百二地望非輕自愧薄材荐

當煩使

謝中

臣編摩末學廢放微生齒髮已衰精力不逮

南宮數月曾淺補於秋毫西部列城又俾司於邦憲恩

波淪骨感涕交頤此蓋伏遇皇帝陛下以堯禹之仁兼

乾坤之量方曲成於萬物豈求備於一人故此孤孱亦

叨推擇臣敢不悉心職事圖報國家庶集涓埃上裨海

岳

謝恤刑表

四時之運可畏者炎赫之時常人之情最苦者囹圄之事適當盛夏寅奉寬書謝恭惟皇帝陛下以赤伏應五行以離明照萬國係累之衆尤軫於哀矜流鑠之辰益加於欽恤以至洒掃洗蕩之事暨療飲食之微皆出詔音可知上德臣謬承使指叨領刑章職事自當如何戒飭況復若此誓當竭盡仰副丁寧

又

天時之運可畏者炎燠之辰小民之情最苦於犴圉之

事特頒明詔深軫睿慈

謝中

伏惟皇帝陛下求端於天為

政以德薰風解愠固已致萬物之和靡草從寬又將重
庶獄之命以至飲食鹽療之節洒掃盥滌之微皆出丁
寧無非惻怛臣叨分使指祇奉刑章職事自當如斯訓
飭況復若此誓殫愚陋仰副哀矜

賀受尊號表

大明繼照鴻號一新夷夏驩呼神人悅喜

謝中

伏惟皇帝

陛下蘊深沉之量奮剛武之資雷厲而風行陽開而陰

闔潛睿謀於不測布神化於無方群臣莫見其天機百
姓焉知夫帝力至於徽稱誠出強名然猶謙以弗居讓
而後受所以聳萬方之瞻仰從百辟之願言煥乎若耀
魄之名天苞乎如崑崙之紀地德盛有表聲施無窮臣
承乏外臺越居遐徼自聞允旨尤切驩心

謝宮觀表

備員闕右無補毫分寄食淮南方虞凍餒忽預真祠之
列稍寬涸轍之憂祇奉寵靈但深感涕

中謝

竊念臣伎能

素短齒髮早衰自脫瘴鄉屢嬰危病顧形體之久瘁何
仕宦之能堪倘真閒官尚沾寸祿是為徼幸今乃拜恩
在臣之愚揣分已過此蓋伏遇皇帝陛下聰明時憲聖
敬日躋廣文之聲行堯之事無克孝悌之美坐格華夷
之和鰥寡孤獨均被于上仁豚魚草木皆遂其生理故
茲蹇淺亦在甄收況洙泗乃先祖之鄉而黃老垂大道
之教杜門養性庶全蕭艾之生克已追愆尤冀桑榆之復
誓堅晚節仰報熙朝

進南郊銀表

伏以報本乎天實神聖之所務來祭以職在臣子而敢
忘迺嚴薄物之陳以為盛禮之助前件銀利先六府名
列中金充貢僅以入輸將誠心而佐饗雖捐山之代不
以此而為珍而共版之儀亦因之而可備臣無任 云云

謝太皇太后表

造舟肇慶天開軒曜之明折俎均慈人被需雲之惠仰
膺寵渥倍積兢慙伏惟太皇太后陛下內播徽音外參

睿斷盡三朝之母道得四海之人心適當彌月之辰共
慶後天之祝乃沐綸言之厚特頒宴豆之歡山竦淵流
已昭一日之澤竹苞松茂更益萬壽之期誓竭疲駑永
酌覆幬

謝皇帝表

沙麓告期方罄華封之祝雲天垂澤遽均鎬飲之歡仰
被寬饒內深慙嘿伏惟皇帝陛下堯仁天覆舜孝日隆
慶父母之誕辰嘉與人之善頌特頒宴喜以示惠慈魚

在藻而物和鹿食苹而賓喜既醉有太平之樂已荷休
恩大亨獲元吉之祥尚期終譽誓當摩殞茂對龍光臣
等無任云云

代都水謝表

議皆素定役不繁興障回狂瀾弭去巨害中謝伏以大河

之患曠古而然雖云天時亦繫人事瓠子之決縱之則
二十餘年館陶之功急之則三十六日倘或朝廷銳意
上下徇公有志欲為事無不集一昨堤防既久雨潦過

常溢鉅鹿以橫流蓄桑浮而南注官守憂惕人言沸騰
異論紛紛自有漂山之勢寸心耿耿但深填海之誠上
賴宸斷主張廟謀敷贊兵夫鱗集木石雲屯曾未周星
已趨故道潤澤既還于北野膏腴亦被于全齊此蓋質
之於心處以無事運聰明之先見天且不違修禮義之
大防水得其性救民昏墊措物救寧臣等親稟睿謨獲
觀成効驩呼踴躍倍萬等夷

代熊伯通滁州謝表

論罪擯歸甘從永廢洗瑕錄用仰荷再生起之謫籍之餘假以守麾之寄榮非所冀感不自勝謝某叢然偏削之材出于卑薄之域胸臆結約本乏異能簿領沈迷寢成俗狀因循半世困躓末流飛龍在天晚乃逢于聖作老驥伏櫪倏自起于壯心稍振仕途屢分使指覘當天之眸表矚出綈之溫言亦嘗宣布漢聲經畧蜀部兵無遺鏃悉上稟於睿謀臣獲息肩遂永綏於鴻化稍升詞掖無領農官然而綆短不可以汲深轅弱不可以任重按

行河瀆果辱命于使令旋返田廬自投身于斥逐中蒙
渙澤進涖真宮顧無職事之勞坐糜祿餼之厚方陛下
宵旰求理之際是臣子犬馬自効之秋而乃栖遲山林
荏苒歲月常恐奄先朝露絕寘周行追省平生之愆尤
不知中夜之涕泗豈謂矜憐舊物付予使藩有社與民
可粗陳于筋力自遠徙近且密邇于封圻此蓋伏遇皇
帝陛下廓乾坤之施以并容推江漢之波以涵濯閔臣
久在散地察臣別無他腸委以左符責其後効臣敢不

拊心悔過刻骨知思念一青之獲新誓萬死以為報桑榆末景猶擊節于功名矢石先登願捐軀于戰陳

代廣州謝上表

分符淮右僅獲到官持節嶠南遽蒙易地無拊循之重寄還論譔之清班望外之榮感極以泣謝中臣有至愚極陋之累無崇英越偉之資向以謬悠自貽褫逐中蒙湔洗稍賜甄收起之散地之微假以專城之寵方且懲艾罪戾深雪精神布宣邦條講究民事殫犬馬已衰之力

報朝廷不貲之恩量分所堪得此固足豈謂坐席未暖
詔墨已濡使作鎮于海邦且綴名于書局恍然自失踈
爾無容此蓋伏遇皇帝陛下大公合天地之心至仁邁
堯舜之德其或犯法則必誅不赦苟能悔過則許以自
新無有終廢之人尚責後來之効况番禺之都會據服
領之要津外連百蠻內統諸郡雖久安于無事當預戒
于不虞至于訓齊師旅之方和輯邊陲之策屬亟趨于
道路阻親稟于訓詞然臣頃者揚旌蜀郡奉饒陝服皆

仰遵于成命致粗著于微勞今推廣其緒餘可徵幸於萬一樓船下浦按故迹之尚存馬革裹尸厲壯心而不已誓當摩殞期稱使令

代謝厯日表

厯象之設管萬事而不遺正朔所加明一統之無外闕

文為幸拜賜知榮

謝中

恭惟皇帝陛下合德乾元求端天

緯盡俯仰觀察之道知財成輔相之方日月星辰莫不順其行雨暘寒燠固已得其序而復稽參六術校定一

書課之疇官頒自天室幼明咸辨杪忽靡差豈獨埜耕
以示乎早晚又知王事必本于陰陽使四時同玉燭之
和致萬物有崇丘之大臣謬當使指獲奉德音敢不推
以訓人奉而從事齊同七政上裨虞舜之明撫順五辰

前合臯陶之訓

初明一作幽明

代謝到任表

竊惟以朝廷養士之百年而主上知人之今日況是將
命尤難選掄豈伊薄材每塵任使愧多負刺懼極臨深

謝伏念臣器不適時智非周物過叨聖獎屢玷使華但知忠義之可行敢以遠近而為擇一留嶺表三改歲端崎嶇瘴癘之鄉奔走狸鼯之野詔旨初下方冀還臺瘠渥載加遽蒙易地惟東南之十郡蓋豐稔者累年財力有餘獄訟滋少當此之際無所營為如臣之愚可以勉強而又畫疆淮上得瞻父母之邦接壤江西切慕弟兄之政實為私幸併出殊恩此蓋伏遇皇帝陛下邁舜聰明無湯智勇敎太平以錫六合操成法以授群臣致此冥

頑尚任驅策敢不牧民以靜馭吏以寬庶收涓塵上補造化

代謝職表

修書還職祈避美名頒旨報聞未俞危懇拜嘉深厚撫迹兢慚謝中臣頃以瑣材上叨煩使不能罄竭千慮答塞萬分積自取于譴訶偶未從于誅戮江湖放斥齒髮凋疎嘗謂絕望煙霄終填溝壑豈料不遺故物猶假大邦以臣間關罪戾之多顛賴困廢之久仰蒙澄雪再効驅

馳使臣骨葬南溟身膏草野雖死之日猶生之年況論
譔之攸司實顯榮之所漸以叙法言之則例不當得以
暮年計之則日亦尚賒豈伊衰遲乃敢冒昧所以加陳
悃愍乞賜寢停藐宸聽之未回怵芻言之難瀆循牆自
失救涕無從此蓋伏遇皇帝陛下有察文愆允之明無
隆天重地之施以臣嘗備從官則稍升以次以臣能悔
前過則可責以功曲借寵呼以壯邊部臣心非木石守
在封疆泣血追愆荷聖神之再造捐軀効命誓軍旅之

先登

代賀聖節表


天生聖人作民父母四海之內蒙被德澤莫不欲其君
之壽考庶幾永永有所依賴而近臣子又因生辰節稽
首稱觴以飾斯民欲君壽考之意謝恭惟皇帝陛下聰
明冠古勤儉厚國藉五聖之餘烈履百年之休運而兢
兢業業日慎一日修明法度持守太平人心胥悅天貺來
格日星光潔海嶽安靜昆虫草木罔不欣嘉誕日之慶

適屬此時內則公卿百官外則四夷君長皆拜舞在列
上千萬歲臣幸遭熙旦僻守遠郡不獲親詣闕庭預觀
盛禮臣不勝瞻天祈聖激切歡呼之至

進否泰說

臣伏讀詔書許臣民實封言事此盛德之舉也人人皆
思有以應訪落求助之意然講兵農叙賞罰若此之類
陛下固已鑒聞而飮見之矣臣不敢効衆策之碌碌竊
有清原端本之論以為治天下在於君子小人之分而

君子小人之分在于否泰之說嘗讀易至賁之柔來而
文剛分剛上而文柔竊歎聖人嘗發其端而歷數千百
年諸儒未有深考而廣陳之者臣不揆淺陋輒觸類而
長之否泰之說各有九卦妄意治天下之術管是矣謹
具左方伏惟陛下博學好問始初清明萬幾之暇畧賜
省覽推而行之或補萬一則臣苦心窮經死且瞑目干
冒宸扆不勝震悖



清江三孔集卷二十九

欽定四庫全書

集部

清江三孔集卷三十

詳校官中書

臣張經田

助教

臣常循覆勘

總校官知縣

臣楊懋珩

校對官助教

臣蔡鎮

謄錄監生

臣何照隣

欽定四庫全書

清江三孔集卷三十

宋 孔平仲 撰

啓狀

寄孫學士啓

伏以天下之情皆忽近而貴遠學者之好每愛少而厭多猶之瀕河之民控乎巨川之會飲之不過滿腹畜之不過盈缸棄擲之餘亦未甚惜汲引之際尚以為勞及

夫處之於大陵之坡徙之於高山之地負擔終日而難
為力鑿井萬尋而不及泉方知涓滴之微不翅金玉之
重然而晚悟豈免悔心昔某之客京師方執事之主文
墨謂見過之不厚則已為門生謂所居之相遼則同在
郡邑惟是天資之懶慢加之日事以因循未嘗接諸子
之遊少得承先生之教可嗟鄙昧不自發明及奔走以
南歸在崎嶇之遠服猿狖之與伍

原闕

但掩卷以長呼

何從咨詢驚去德之已遠將于十里之外而往有求尚

以前日之稽頗用自愧然而先聖典策雖萬世之下而得觀中國詩書雖四夷之人而獲見立教者固無遠近成德者豈有親疎彼往者之不追及叩之而必應用此自解未必見尤迺有閒暇之時作為文章之伎託自置郵之內委諸衡石之前願於校讎之休賜以觀覽之辱行李之便特枉緒言遐陬之聞何異親炙下情不勝冀望之至

與張大博啟

伏以天下之士孰不汲汲而相求君子之心何必區區而後信或一言而志合或目擊而道存迺於邂逅之間識其平生之際某雖甚鄙竊學於茲然其聰明未足盡諸於已至於去就敢有擇於他人雖淺陋不知其它每踴躍欲行其素觀百世之上見忠義而必嘉况一時之中有正直而不比恭以知縣大博涖官劇邑敷惠遠民頃因經從幸遂請謁始見於簿書之冗剖決如流再從於樽酒之歡是非必當指明姦邪而曲見情偽刺譏權近而

不畏謗嫌剛氣發而縱橫滿座為之辟易惟是慕德將
以為師迫於南歸故從容之不暇及其遐想翻悔恨以
無窮恭惟自得之深養而愈大特立之介守而不回摧
居諫諍則有汲黯之風進參左右則勵魏公之節使蒼生
之望得皆見乎古人小子之知不自負於今日下情祝願
豈勝拳拳之至

國學解元謝啓

伏覩解榜叨被薦名切以國家之興文物甚盛舉天下

之士甚多至於十萬而預歲中之選者不足乎二千又況太學之居尤為豪俊之會南窮北際陸走川浮紛然而來豈可勝計以敵其小不若敵其大之為武得於外不若得於中之為榮皆抱師友講習之功累年積學之力以相比量復得館殿儒雅之臣深見偉識之士為之衡鑑苟克其數為幸已深矧在上游豈易以處如某者學不足以通天下而涉獵以自鄙才不足以動世俗而蟲篆之為羞幼承父兄教訓之勤長蒙庠序熏灼之美

僅能秉筆趨於大較之前不圖積薪輒在群公之上默
揣其自誠有所因此蓋伏遇某官為國旁求存心樂育
采以下體収其寸長致此妄庸免於黜落敢不益勤修
省愈究精微庶幾後効之収以為至公之報

謝徐郎中啟

某竊以方今為後進之計皆願出先達之門然而或終
身而不相知或一見而得異顧皆繫乎幸與不幸不在
乎才與不才某天姿慳侗吏事滅裂當明公出使之日

欽定四庫全書

清江三孔集
卷三十

四

實寒迹去官之秋雖不逮事於威嚴亦嘗獲望於顏角
豈期待之無間接以至溫以大微積星之尊無繡衣直
指之重迺寵堦墀之賤特均樽俎之歡在上之人誰肯
若此不肖之意自宜何如由阻遠於崇墉方復勞於行
役不時奏記甚愧負芒當青律之已終計玆輪之多暇
衛生有術擁福無疆恭惟某官以精明之才當重大之
委自江之左杖節以臨宣使者之光華邁古人之丰采
除弊照偽吏不敢欺寬繇薄征民受其賜藹然駿望簡

在清衷不次之榮可倚而竢某方還侍下正遠座隅默
省寅緣嘗蒙於盼睵尚期邂逅獲托於庇庥

上運判屯田狀

某竊以求聞於世所難得者特達之相知受之於人又
難得者始終之如一顧惟淺陋向託部封自引拜於堦
墀洎告辭於行屏歷時固久蒙惠甚均蓋待下之從容
皆由中之恂懔故無變易尤切感銘恭惟某官賦資深
沉挾量宏偉志優名美居不倦於討論官高職崇動必

欽定四庫全書

清江三孔集
卷三十

五

由於法律清明如日端重若山豈外計之可淹想嚴召
之伊邇小則翱翔於臺閣大則運動於樞機所養有餘
何施不可某久於恩館齒在仕塗豈獨一身敢私於庇
覆願同庶物皆被於生成

謝洪師大監啟

某賦性之愚筮仕伊始自天與幸得公來臨伏蒙寬明
曲賜假借豈獨逃於吏責又獲與於薦章世蒙厚恩不
勝感激士重知己何以報償間違榮戟之嚴衝冒波濤

之險淹留在道稽緩馳書雖未譴誅然甚皇恐恭惟某
官挹器閔富逢辰穆清累更中外之繁夙著聲實之美
惟鍾陵之巨鎮據江左之上游軍民至穰談笑以治衆
欲借留於善政上方圖任於老成還朝之榮倚席可俟
方春云暮於氣極暄更祈順序養安慰人屬望

謝洪倅啟

某天資至頑吏事不敏向備員於簿領幸託迹於庇庥
屢趨門庭又屬車馬告辭曲謁之日留意挽舟之兵使

無風濤之虞愈知恩德之大此蓋某官寬明直性謙靜秉心以為待下雖勤固不失乎為上之道與人無間適足以增知己之光忘其尊高習以成就乃下親於卑賤皆曲盡於優容雖甚愚蒙豈不感激方朝廷之籲俊况器業之邁倫想在匪朝進用不次更祈順序自重慰人所瞻

謝洪簽啓

向者初官獲依幕府伏蒙盛意曲究賤蹤知其不甚頑

愚察其精有持守待必加於異禮言皆出於至誠為幸之多免責而去至於感激何以報償此蓋某官賦識有餘挾量甚偉廉勤清介傑然良吏之規模公正剛明卓爾古人之風節而又勤於好善和以接人不以官高而自矜惟求道合而相喜豈期朽質亦玷崇墉恭惟素積陰德而天將報之兼有期望而上所簡在佇登要用以慰鄙心非敢希庇廕之私實將觀設施之大過此以往未知所裁

謝江知州知郡吏部狀

某自接士論已聞風采之高近覩治風始親教誨之厚
以德而論則賢愚之相遠以爵而言則貴賤之不同而
蒙獎其片文待以異禮謙挹如此愧服無涯間違榮戟
之嚴衝冒波濤之險淹留越月訊問後時伏惟至明尚
未遐棄恭以某官稟天醇粹為世偉豪向者居諫諍之
司慨然存忠義之節事皆密啓非同淺俗之暴揚言有
一違不效常情之苟且進非為已退亦相時自南院之

清崇出支郡之僻小勤勞民政寅畏官箴未嘗修體貌
之尊又以知度量之大上思舊德時企正人佇見召還
以符屬望某方歸親侍正遠使軒翦翦薄材被恩於一
顧區區末官冀託於餘庥

謝鄂守張職方啟

比者罷秩歸寧經塗請見過蒙顧遇尤切感銘自阻遠
於崇墉方服勞於行役闕然奏記甚矣覲顏尚冀高明
曲加寬貸恭惟某官夙著異等屈臨一邦處之有餘坐

以無事臺閣之選旦夕以須方淑氣之甚暄想沖襟之多裕更祈遵養少副願言

謝襄州史大卿狀

竊以貴之待賤卑者視尊先王之經固有等差以相制後世之薄乃至隔塞而不通居上者貌然而自高在下者畏之而難進欲祛此弊當得偉人昔恨未聞今榮親見恭惟某官位為刺史秩在正卿問俗觀風六持於使斧承流宣化累綰乎郡章爵齒俱尊中外攸服某半通

賤吏一介書生其行誼不足紹古人之休其文米不足收
當世之譽徒以往還之際宜宣奔走之勤以材而論則
賢否之不同以勢而言則輕重之殊絕乃蒙畧去體貌
之峻接以語言之溫烜赫旌麾下臨於館舍從容樽俎
嘗沐於宴歡雖矯曲鎮浮自將敦盛德之重而寡聞款
啓何以當至意之隆但切悚皇仍增感激越治封而未
久想祥履之彌休再惟明公宇量端閎風猷清遠藹然
搢紳之公論簡在當宁之深知暫留一邦實鬱餘地佇

登不次之用以究非常之才方秋之初於氣尚熱伏期
順時保練對國寵光

謝荊門知軍啓

向者北走帝都南還親侍兩趨赤戟再屈朱轡蒙下接
之加優結中藏而增感越治封而未久計祥履之彌休
恭以某君天機精明世務詳練措諸萬事莫不左右而
皆宜施之一邦不勞指顧而自治考之公論言未盡有
餘之才想在匪朝當別拜非常之命更祈順時保育對

國寵光

謝舉職官啓

伏蒙恩造舉充職官某託身旌節承乏簿書不責素餐
已為大幸更塵清舉益以厚顏竊惟國家之隆遵用祖
宗之制慎重考績精明舉官嘗謂廟堂之深不知郡邑
之遠分使者以之部代天子之省方若漢代之繡衣如
唐家之清詔辨人才之善惡察治狀之貪廉外言中行
朝奏暮報半詞之貶終身或為廢人一語之褒不日得

居顯位以此百城率職郡吏畏威汙者滌濁以求清懦者激昂而自力至於端士亦有戒心雖希進之甚多然限員之至少苟非聲華盖世豪偉絕羣如鸞鳳之於羽毛焯然文耀譬芝蘭之於草莽茁爾秀英則何以才結當塗名申奏牘如某者江西之陋府下最卑責之學問則不能牽合以就時求其政事則未嘗擊搏而取譽自知賦分之甚薄安敢出強而爭先絕去機關養成樸野深憂吏議忽辱已知揣實何功歸恩有地此蓋伏遇某

官忠嘉自許敦厚以臨泰山之安不為勢之所動天時
之信均於物而無私坐攬十州之權曲収一介之善至
明宣乎幽隱鉅力振乎滯淹遂使冥頑亦叨推擇棄軹
所至尤憚澄清之威入幕非才豈堪保任之意博觀世
俗之行已多以歲月而自勤甚異聖賢之論心質之鬼
神而不忤愚也不佞擇之已詳每希古人今出門下一
階之進由此有涯終身之修誓以為報

謝程卿舉職官啓

伏蒙台造舉充職官某賦材無狀尸祿有羞剪拂所加
榮愧增劇竊以舉吏之制於今尤難在下者求之甚勤
居上者擇之亦慎仕宦之末塵埃之勞若非甄明無復
升進故不得不勤於求官高職隆望大責重所引或失
為累相隨故不得不慎於擇而又儒言墨行鳳采鷲心
朝為伯夷暮為盜跖如此之輩相亂其間故於欲舉之
時不無可疑之慮惟其下之人素修之甚篤上之人糾
察之已詳迺可推稱保其始卒預此選者不亦難乎如

某者技能不足以設施學問不足以緣飾但知廉恥之
可喜寧憂介潔之無徒盖父兄教習之使然非歲月勉
強而為此忤物益衆持心益強苟非至公誰復見采伏
遇某官操使者之重抱古人之明峻風采於百城熟舉
錯於群吏惟是淺鄙最蒙主張屢加獎借之言嘗啓薦
揚之意為令之恥非同汲黯之褊心製錦則傷益患尹
何之未學豈期特達之遇更賜吹噓之恩雖非入幕之
材實有提衡之漸敢不益敦士檢加畏官箴誓殫犬馬

之勤仰答丘山之厚

謝方卿舉職官啓

竊以國家嚴考績之文重舉官之法在貴者必援於賤
居卑者必藉於高然而至公者以天下為懷自守者以
已知為緩苟欲敦厚薄俗扶翊高風則以能自守之人
聞於朝廷苟欲不事請祈自然名節則以未嘗求之知
重於山岳如此則在上者有補於教化在下者固得其
操修欲復大淳最為至要不講此道於今幾年在王者

欲人之求在下者惟勢之合求而與之則適足以長澆
浮之行求而得之亦不以為特達之知以至干戰相攻機
關並發陰窺密伺仕路以之風波巧說甘言聞者為之熒
惑進不以正得亦遽忘奏封朝行禮節暮喪鄙惡之敝一
至斯乎自惟蒙暗之資粗知進退之分向緣薄藝偶得
一官內屑屑於廉隅外區區於職事但知強力而自勉
安敢出強而爭先人皆笑之已獨安若恭遇某官操使
者之重抱古人之明斷獄尚欲其不冤察吏豈容而自

晦以敦重薄俗為已任以扶翊高風為素心遂賜薦揚以收孤陋乘輶所至尤畏澄清之威入幕非才豈堪保任之意敢不愈持特立之介加勵不回之堅誓全始終論報知遇

謝周學士舉職官啓

竊以職官之舉蓋自近歲而方行會府須推亦以一人而為率況值清華之彥來持師帥之權奏請之間朝廷觀其予奪設施之際郡國以為表儀所當薦論尤繫輕

重加之節下之諸吏傑然江左之上游而求一人以副
新制預此選者不其難乎如某者天資疎頑吏事淺拙
雖粗知於庶介然不識於疏通辱憐甚愚移處至近承
乏簿領兼局米鹽況歲月以冒居絕絲髮之成効苟逃
遣逐已極并容忽被甄收豈勝感激茲蓋伏遇某官心
勤內恕道戒遐遺經世之才尚曲成於萬物使人以器
豈求備於一夫遂使冥頑亦叨推擇褰帷以視方憚刺
史之威入幕非才豈堪從事之任推輪蓋自於今日推

穀尚期於異時敢不畏迪官箴恪修士檢誓無名節之變庶結始終之知

謝提刑大博舉京官啓

伏蒙恩造舉充京官竊以朝廷之制薦擢為艱仕宦之塗甄升有次其始則舉以縣令其次則進於京官縣令則止於三考之間京官則保其終身之際三考之內尚可勉於自修終身所為誰能必其無過此下吏所以難得知已而上位所以不敢進人自非潔白有聞聰明所

信則何以綴名剪拂發跡單寒如某者朽木微材青綸
賤屬文學不足緣飾政事無所設施拘於山谷深僻之
鄉困於簿領塵勞之役自慚鄙陋何結高明敢期特達
之誠曲假薦揚之寵榮生望外感溢意端此蓋伏遇某
官偉量并容公心果斷柄百城之舒慘照群吏之貪廉
收其寸長取以片善遂使孱懦累荷吹噓去歲則有縣
令之章今春則有京官之薦既期以三考之無失又保
其終身之不瑕如此待人之至誠將何論報於盛德敢

不增勤士檢加畏官箴庶成絲髮之功少答丘山之遇

上密守啟

言念某治身闕畧處世迂疎向僅習於簡編遂誤塵於
科第自罷官於縣道方進等於賓筵將効驅馳遽移任
使頃奉行於新詔徃倡率於諸生以其學問荒唐文章
鄙淺固當退避安可叨居然而吏責之差輕又有德庇
之可託故茲受命漸以治行方素節之戒涼望黃堂而
馳想恭惟頒條有暇介福無疆伏以某官以剛明之才

當屏翰之寄屹然鎮靜著於歌謠寔百吏之表儀為一方之師帥自惟瑣質將侍教言上思賈誼之方深民借寇恂而莫得但恐迅詔已在半途倘或賤迹未伏於軒墀大旆已歸於京闕則仰高之意無時以伸惟是怔忡不遑寤寐更祈上為宗社精調寢興

上密倅郎中啟

言念某賦職最卑効官未久使當教育之任深有曠敗之憂惟盛德之可依故私心之為慰方將展軫就道望

履趨風恭惟某官秉性堅平宅心惇大上直哀烏之位
出展良驥之才藹然治聲簡在睿眷宣化萬里歌詠別
駕之功細書十行對揚宣室之召某自惟鄙陋即獲參
承喜抃之多敷宣莫究

上青州知府狀

祇奉命書濫居黌舍位卑責重才薄愧深方朝廷講三
代之隆而主上嚮六經之教先由五路稍興庠序之風
特建一官為陳義禮之學必得出羣之彥以當傳道之

尊如某者膏不知方戇非適變雕蟲篆刻之技僅足進
身簿書期會之勞寢忘溫故偶塵慎揀何以應諸生之
求默揣先容疇乎有一言之助此蓋伏遇某官純誠樂
與高誼兼收向筮仕於江西曾備員於節下優蒙顧接
首辱薦論至於今日之誤除出自當時之引重丘山之
賜頂踵莫酬况高密之名藩迺文公之舊治仁風德政
之尚在途歌里詠之不忘民經師帥之良士漸教育之
久故茲承乏愈易養成敢不內竭冥頑日勤倡率庶幾

無曠仰報見知

上察訪舍人啟

近聯吏屬復覘使華以禁管之清兼諫垣之要專被睿
旨總按東方而茲鄙陋之無堪乃辱謙虛而與進仰惟
道塗偃薄福履滂洋恭以某官清慎純粹而得古人之
風厚博寬和而有大臣之體著於士論簡在上心佇還
闕廷進處機密某自惟不肖謬出所知盼睽之榮固已
重於九鼎成就之德尚有託於一陶更冀順序保調副

時屬望

謝運使舉京官狀

竊以天下之欲莫不有求人情之常有貴難得明珠淪
於鉅海美玉閔乎深山驪龍之宮所珍白虹之氣自照
探之者凌汗漫而徼幸攻之者窮歲月以徒勞惟其不
可必取故得之為難惟其謂之難得故獲之為寶擬之
類取盖有甚焉恭惟某官抱間世超越之資提一路黜
陟之柄風采震動海內之所推高器畧深閔天子之所

倚重其咳唾足以為榮辱其指顧足以關戚休素引拔者多至公卿願依附者莫非俊傑幸見顏色曠若覩乎青天獲侍語言欣然踰於華袞況當論薦尤極寵光宜有非常之奇以克甚盛之選如某者江西之陋府下最卑學不足以知至大之倪才不足以達無窮之變區區賤事瑣瑣僻隅衆人皆誚其頑明公獨知其質謂其粗習於文字故獎其片詞謂其篤守於廉隅故待之異數不加譴逐曲賜甄升此衆人之所難求而平仲之所獨

得感激之極以至無言喜并之餘竊憂有負博觀世俗之行已多以歲月而自強甚異聖賢之論心質之鬼神而不愧愚也不佞擇之已詳每希古人今出門下一官之進由此漸階終身之修誓以論報

謝趙資政舉京官狀

伏蒙鈞造舉充京官某聞之古之所謂知己蓋以特達而相期今也艱於舉官由此因循而近薄士多失於自重人或責其有求惟其在下而無意於進者可以見自

守之一端薦士而不使之知者可以為大公之高節某
誦此之說固已有年考之於時誠亦無幾自惟天資淺
陋學問荒唐不足以借譽英游希榮先達以此安恬而
養拙固非立異而好高至庠序之興教率之任毆而處
此心甚愧之尚不免流俗之罵譏安敢希大臣之推擇
豈謂某官廓并容之量收齷齪之愚虹霓之輝下臨於
朽壤江海之潤旁及於枯荻特剡褒章已通上聽曠日
持久未有聞者鎮浮矯俗豈徒然哉況元帥之於部中

所薦才二三之寡而賤迹之於門下何嘗有左右之先
其始則未信於流傳既知則不勝於感激重惟閣下四
輔之貴百辟之師德之素尊故天下觀其進退言不安
予故士論以為重輕苟得咳唾之餘已甚丘山之賜希
餘光者甚衆何不肖之頑蒙雖捐微軀莫稱大惠但當
激昂衰懦鞭策疲駑畏慎庶隅已知儒者之當守高明
遠大更慕古人之所存惟其於義而不欺所以報公者
有此

謝判院舍人舉京官狀

沙汰之餘在所不取典司非正可以為辭而又從事之日未深登門之路最晚苟逃譴責已為雅度之并容忽被甄拔尤見至誠之特達得之非意感亦無窮某天資冥頑吏迹奇蹇世喜聞於圓媚應對失之大方人習尚於雷同分守期於無愧居常寡助動輒見尤自非曠然誰肯憐者恭惟某官抱經綸之遠器居侍從之上游其為中也篤實而不欺其為外也莊重而有法士皆爭出

門下上方倚為公卿固有想見風采之未遑願事羈勒而弗得惟茲淺陋吏處賤微本無一介之先容但與同寮而旅進所言職事可以見肝膈之存相接須臾未足盡平生之學而乃賜以顏色薦之朝廷此其螻螻之私何啻丘山之重士為知己古有殺身人豈無情今將報德苟非深造於道何以有為於時若夫正心誠意之大端讀書業文之餘事近而行已遠以事君從容進退之間慷慨功名之會更祈教誨以託始終

上提刑職方狀

某聞古之盛時人以直道有功者顯有德者尊三代毀
譽之已亡聖人褒貶之不作言行之有所異或取禍焉
仁義而不自矜亦無知者頽波至此公議奈何恭惟某
官得剛方厚重之資行緝熙光大之學操持義理之當
矯拂世俗之浮中立以視乎紛紛高論不為於碌碌齊
州之策脫萬家於虎口之危中書之謀措兩朝於泰山
之固此皆神明叶贊之陰德社稷倚賴之元勲曲突徙

薪不蒙功賞繡衣持斧自以材升在於平居之所言未
嘗及此豈謂不肖之可語特以告之嗟乎某治已則愚
觀人則智善善惡惡素學於仲尼是是非非嘗聞於荀
子如公之偉曠代所無雖甚冥頑固深仰服方竢輜軒
之東指獨趨宴坐之下陳再扣緒餘更詳本末然後文
為野史播在聲詩潤色幽光鼓吹盛美比聞嘉拜天綽
領職計廷倅裝不暇於來臨守局無緣於往見區區之
願歉歉莫伸方今外連兵以剪叛夷內改法以籠諸貨

縣官之蓄所費不貲大農之司其責尤重徐之則國無以給亟之則民不聊生所恃博通之才必有兼濟之術災蒸向盛衝涉為勞更祈善調寢興少副願望

上安撫諫議狀

向日沿牒濟南嘗瞻大旆假塗戲下又造崇墉赫赫侍從之尊岩岩連帥之望而茲隸屬最號顓愚一見蒙顏色之溫再見辱語言之厚以至咨嗟近詔之興學詢問諸生之改科遠大君子之存心博篤古人之持論從容

侍側反覆求言適當開府之云初竊恐教人之未暇遽
茲還局日以仰高恭惟某官勤勞著於王家問望高於
世表氣和體重出於天性之自然內明外嚴卓爾相門
之餘烈比由西服來殿東藩瞻顧全齊密邇上國於今權
柄之甚盛自古豪傑之所窺鎮以長才山川有四維之
勢帖然雅俗廟堂無外顧之憂然而時企老成上欽舊
德行赴鋒車之召入當台席之虛某托迹部封備員庠
序不才之甚孰為蟠木之容惟日以須當預大鈞之福

上章樞密狀

伏審光奉制麻入居樞席股肱之喜聲氣皆同國家積治之百年睿聖勵精於今日綜核名實而期於至當任賢使能而責其成功內則朝廷之百工遠至郡縣之小吏率皆慎揀固有冒居況若左右輔弼之臣所繫社稷安危之本付畀之意輕重可知恭惟某官以天人之學蘊諸中以神明之才厝於外鬱然棟梁之器渙乎河漢之章以古人敬謹結主知以天下治安為己任越唐房

杜軼漢蕭曹致君澤民者已三朝出將入相者幾十載
向者運籌西府秉軸中台銜恤而歸不以詔書而奪志
訖哀之始已聞使者之及門遂以弼亮之功兼司宥密
之任佇盡經綸之畧以成熙皞之休某夙以空疎猥蒙
論薦今居幕府仍在海邦崎嶇簿領之迷汨沒塵埃之
困鹽車之馬已叨推轂之榮涸轍之魚尚冀為霖之賜

上鄧舍人狀

言念闕然參侍已積歲時職是驅馳遂稽竿牘企清規

而方切聞直指之將臨仰惟奉詔夕行兼傳東出觀風
多暇視履有休恭惟某官偉識際天溫文賁國所存於
中者自任之重其過乎上者則哲之明天祿離書屢參國
論紫微典誥又擁使旌蓋才識浩沛而有餘故柄用更
番而不一某備員於此核寔何堪力以自強雖竭愚夫
之千慮教其不逮尚希長者之一言依庇有時抃手無
已炎蒸方盛區薄為勞更冀順序保調副人屬望

上呂學士狀

一去門牆屢更歲月驅馳職事闊畧置郵仰望鸞鴻之
飛日深燕雀之慕比聞宣奉上命出按東方緬惟區薄
長塗饗承多福恭以某官燦爛於中者緝熙之學發越
於外者通變之才言與行而光輝名隨實而閎大上知
淹雅首寘清華寶字芸香入直圖書之府繡衣金節外
操黜陟之權威流百城望軼八駿某省躬無狀承乏有
年昔以薄材最蒙知於伯氏今茲厚幸又託庇於王人
上提刑狀

金定四庫全書
卷三十
伏審光奉宸恩榮總天憲恭惟歡慶伏以某宅心明恕
秉德直溫卓爾自持之高綽然所至之譽向司外計尤
簡上心就倚使乎之良輔宣欽哉之意秉軺聿素當不
俟於澄清召節在塗佇別承於優渥更祈保衛以副願
瞻

上安撫狀

言念接壤治封馳情帥座以上下而論其勢則殊故起
居之儀不時以講方大冬之凝洵想幕府之優游民溢

歡謠神儲景福恭惟某官惇純厚粹以為質疏通寬博
而有臨權尊旄丘望重青部上思舊德之茂即踐通聯
之華更祈順序保安副人屬望

賀青倅監丞啟

伏審就領命書出監東郡恭惟慶慰伏以某官靜而鎮
俗端以儀朝貴重金奏之英平直玉律之議暫茲補外
當已戒塗某備員庠中託迹府下即依盛德之庇預極
私心之懽

回都巡賀到任啟

言念有素欽

一作披

風無階拜德來備負於黌舍幸託庇

於英寮息肩尚苦於紛紜馳問尤慙於稽緩先蒙教敕
深荷謙光當凝洎之留辰計起居之集福恭以某官才
蕪文武久著威名暫留外藩頗鬱遠器願加保護別對
寵休

上江寧知府狀

至愚極陋之迹久困泥沙崇英逸偉之姿邈在霄漢未

嘗望履徒切仰高比者綴園府之下陳托大邦之美蔭
以爵則連帥之重當修屬吏之儀以德則世師之尊宜
請先生之教拘攣莫騁苑結為勞伏審已合使符肇班
氏正神明來相戢穀增蕃恭惟充義以為剛合道以為
大人期以宰相之器上知有經綸之才從容去就之間
慷慨忠嘉之節暫均偃息行預弼維方冬律之沍寒計
鈴齋之富暇更祈為國自重副時所瞻



清江三孔集卷三十